

broj: 21-06-2/2024  
Sarajevo, 06. 11. 2024. godine

Na osnovu člana 18. Zakona o udruženjima i fondacijama („Službene novine Federacije BiH“, broj 45/02), člana 25. prečišćenog teksta Statuta Udruženja stomatologa u FBiH (akt broj 02-11-1-2/2020 od 30. 11. 2020. godine), i prijedloga Predsjedništva Udruženja (akt broj 18-05/2024 od 07. 10. 2024. godine), na redovnoj sjednici Skupštine Udruženja stomatologa u FBiH održanoj dana 06. 11. 2024. godine **u s v a j a s e**

## **PREČIŠĆEN TEKST STATUTA UDRUŽENJA STOMATOLOGA U FEDERACIJI BOSNE I HERCEGOVINE**

### **I - OSNOVNE ODREDBE**

#### **Član 1.**

Ovim statutom uređuje se ustrojstvo Udruženja stomatologa u Federaciji Bosne i Hercegovine (u daljem tekstu: Udruženje), te se utvrđuje naziv, sjedište, područje rada, znak, pečat, pravni status, svrha i programski zadaci, djelatnosti, sredstva Udruženja, te način njihovog sticanja, korištenja i raspolaganja, uvjeti i načini učlanjivanja u Udruženje i prestanak članstva, prava, obaveze i odgovornosti članova, upravni organi Udruženja, način njihovog izbora, uvjeti i način opoziva, trajanje mandata, način odlučivanja i odgovornost, zastupanje i predstavljanje, način donošenja odluke o prestanku rada Udruženja, javnost rada, način donošenja Statuta, izmjena i dopuna Statuta, drugih akata koji proističu iz ovog Statuta, te druga pitanja koja su od značaja za osnivanje i rad Udruženja, a saglasno odredbama Zakona o udruženjima i fondacijama.

#### **Član 2.**

Udruženje je nevladina i nestranačka organizacija osnovana radi stručnog, profesionalnog i dobrovoljnog okupljanja stručnjaka iz oblasti stomatologije sa teritorije Federacije Bosne i Hercegovine (u daljem tekstu: Federacija), a s ciljem kontinuiranog razvoja stomatološke djelatnosti, popularizacije naučnih dostignuća iz stomatoloških i drugih srodnih medicinskih nauka, te njihove primjene u praksi, uključujući u navedeno jačanje i dalje unapređenje stručnog i naučnog rada u oblasti stomatologije kao značajne komponente reforme zdravstva u Federaciji uopće.

Osnovno programsko načelo Udruženja je poticanje razvoja i unapređenja stručnog i naučnog rada u oblasti stomatologije, saglasno načelima i pravilima struke.

#### **Član 3.**

Naziv Udruženja glasi: **UDRUŽENJE STOMATOLOGA U FEDERACIJI BOSNE I HERCEGOVINE**.  
Skrraćeni naziv glasi: **Udruženje stomatologa u FBiH**.  
Sjedište Udruženja je u Sarajevu, ul. Bolnička broj 4a.

#### **Član 4.**

Udruženje se registrira kod Federalnog ministarstva pravde čime stiče status pravnog lica.

Područje rada Udruženja je teritorija Federacije.

#### **Član 5.**

Udruženje ima svoje žiro račune.

#### **Član 6.**

Pečat Udruženja je okruglog oblika, standardnih dimenzija sa ispisanim punim nazivom Udruženja, i to u obodu: Udruženje stomatologa u Federaciji Bosne i Hercegovine. U središtu je skraćeni naziv Udruženja, i to: Udruženje stomatologa u FBiH.

Udruženje može imati i znak.

Znak Udruženja iz stava 2 ovog člana može biti stiliziran.

## **II - SVRHA, CILJ I DJELATNOST UDRUŽENJA**

#### **Član 7.**

Ciljevi i zadaci Udruženja su:

- usklađuje stručne i naučne interese svojih članova, podstiče naučno- istraživački rad članova i institucija,
- sagledava stanje razvoja i potreba u oblastima ostvarivanja stomatološke djelatnosti, te predlaže mjere za unapređenje stanja u toj oblasti,
- organizuje i provodi odgovarajuće oblike edukacije svojih članova,
- organizuje stalni rad na vaspitanju i podizanju stomatološke zdravstvene kulture građana,
- organizira prezentaciju i popularizaciju naučnih i stručnih dostignuća na simpozijumima, kongresima i drugim organizacionim oblicima transfera znanja, pruža neposrednu stručnu pomoć doktorima stomatologije, specijalizantima i pripravnicima,
- ostvaruje saradnju sa komorama liječnika-doktora stomatologije u Bosni i Hercegovini, liječničkim komorama, komorama medicinskih biohemičara, komorama medicinskih tehničara, te drugim srodnim organima, organizacijama i udruženjima u zemlji i inostranstvu,
- podstiče i samoaktivno i objektivno obavještava javnost o stanju u stomatološkoj djelatnosti i populariše dostignuća iz oblasti stomatoloških nauka,
- izdaje svoj časopis i druge edicije iz oblasti stomatologije,
- razvija i jača odnos članova Udruženja,

#### **Član 8.**

Djelatnost Udruženja ostvaruje se u sljedećem:

- saradnji sa Federalnim i kantonalnim ministarstvima zdravstva i obrazovanja,
- saradnji sa naučnicima, naučnim institucijama i organizacijama koje se bave stomatološkim djelatnostima u zemlji i inozemstvu,
- saradnju sa zdravstvenim i obrazovnim ustanovama, privrednim društvima koja se bave proizvodnjom i prometom lijekova, medicinskih pomagala, kao i stomatološke opreme iz oblasti djelokruga Udruženja.

### **III - SREDSTVA UDRUŽENJA**

#### **Član 9.**

Radi ostvarivanja svojih ciljeva Udruženje se koristi materijalnim i novčanim sredstvima.

Udruženje stiče novčana sredstva potrebna za rad:

- iz članarina i upisnina,
- dobrovoljnih priloga i poklona fizičkih i pravnih lica
- sredstvima dodijeljenim iz budžeta,
- prihodima od kamata, dividendi, dobiti od kapitala, zakupnina, honorara i sličnih izvora pasivnih prihoda,
- prihoda stečenim obavljanjem privredne djelatnosti,
- drugih prihoda stečenih u skladu sa Zakonom i ovim Statutom.

#### **Član 10.**

Sredstvima Udruženja raspolaže Predsjedništvo na temelju finansijskog plana.

Udruženje je dužno voditi poslovne knjige i sastavljati finansijske izvještaje, u skladu sa Zakonom i drugim propisima.

Finansijsku dokumentaciju potpisuje predsjednik Udruženja, te je isti ujedno i odgovorno lice za materijalno-finansijsko poslovanje Udruženja.

Izuzetno od odredbe stava 3. ovog člana predsjednik Udruženja može ovlastiti i druga lica (potpredsjednici, generalni sekretar) za potpisivanje finansijske dokumentacije u slučaju njegovog odsustva.

Finansijsko poslovanje uredit će se posebnim aktom.

Predsjedništvo Udruženja dužno je podnositi izvještaj o finansijskom poslovanju Skupštini najmanje jednom godišnje.

#### **Član 11.**

Udruženje može da kao organizator ili suorganizator stručno naučnih skupova u realizaciji naučnog dijela angažuje predavače po pozivu.

Udruženje također može da kao organizator ili suorganizator stručno naučnih skupova u realizaciji organizacionog dijela angažuje pomoćno osoblje.

Navedeni angažman iz stava 1. i 2. odobrava predsjedništvo Udruženja i mora biti u skladu sa finansijskim mogućnostima Udruženja.

Prilikom organizovanja stručno naučnih skupova u kojima je Udruženje organizator ili suorganizator može se donijeti odluka o oslobađanju dijela obaveza ili obaveza u potpunosti kod plaćanja kotizacije za pojedine učesnike, članove Udruženja, kao i članove organizacionih odbora skupova ispred Udruženja. Ovu odluku donosi predsjedništvo Udruženja.

#### **Član 12.**

Predsjedništvo Udruženja dužno je upravljati imovinom Udruženja s pažnjom dobrog domaćina.

Ukoliko Udruženje obavlja privrednu djelatnost, u skladu sa Zakonom, Predsjedništvo Udruženja dužno je upravljati imovinom koja se koristi za obavljanje privredne djelatnosti s pažnjom dobrog privrednika.

Članovi organa Udruženja ne mogu glasati o imovinskim pitanjima u kojima se on, njegov bračni drug ili njegov srodnik do trećeg stepena, pojavljuje kao zainteresirano lice.

Članovi organa Udruženja dužni su osigurati da se svi pravni poslovi Udruženja zaključuju po tržišnoj vrijednosti, ili pod uvjetima koji su povoljni za Udruženje.

#### **IV - ČLANSTVO**

##### **Član 13.**

Članstvo u Udruženju je dobrovoljno i stiče se upisom u Registar članova.

Redovnim članom Udruženja, u smislu člana 2. Zakona o udruženjima i fondacijama, može postati fizičko lice koje se bavi stomatološkom djelatnosti, kao i svi drugi naučni i stručni radnici iz drugih djelatnosti koje su u uskoj vezi sa djelatnostima Udruženja, a koji prihvate odredbe ovog Statuta, programske zadatke i plaćanje članarine.

Redovnim članom Udruženja, pored lica navedenih u stavu 2. ovog člana, može postati i pravno lice (zdravstvene i obrazovne ustanove, komora iz oblasti zdravstva, privredna društva koja se bave proizvodnjom i prometom lijekova, medicinskih pomagala, stomatološkom opremom i sl.), koje prihvati odredbe ovog Statuta, programske zadatke i plaćanje članarine.

Počasni članovi Udruženja su lica koja nisu redovni članovi, a svojim radom i zauzimanjem doprinose afirmaciji rada Udruženja, kao i unapređenju ciljeva i načela Udruženja.

Počasne članove bira Predsjedništvo.

Predsjedništvo može izabrati i počasne predsjednike Udruženja. Ukoliko su izabrani, počasni predsjednici ulaze u Počasno predsjedništvo Udruženja.

Počasni članovi mogu biti donatori, predstavnici međunarodnih organizacija, strani državljani, partneri u projektima koji prihvate zamolbu Udruženja da pristupe istom u svojstvu počasnog člana i tim činom preuzmu odgovarajuće obaveze utvrđene ovim Statutom.

Počasnom članu uručuje se povelja o članstvu i iskaznica počasnog člana. Počasni članovi imaju pravo učestvovati u radu organa Udruženja.

Kandidat koji želi postati počasnim članom Udruženja dužan je podnijeti molbu. O učlanjenju odlučuje Predsjedništvo.

##### **Član 14.**

Članovi Udruženja mogu se učlaniti kao:

- redovni članovi Udruženja,
- počasni članovi Udruženja.

##### **Član 15.**

Prava člana Udruženja su:

- učestvovati u radu Udruženja,
- birati i biti biran u organe Udruženja,
- davati ocjene, mišljenja i prijedloge o radu Udruženja,

Dužnosti članova Udruženja su:

- svojim ponašanjem i držanjem dostojno prezentirati Udruženje,
- raditi na ostvarivanju ciljeva Udruženja,
- izvršavati obaveze koje su mu povjerene,
- čuvati čast i dostojanstvo člana,
- plaćati članarinu,
- pridržavati se Statuta i pravila Udruženja.

#### **Član 16.**

Članovi mogu uživati pogodnosti članstva u Udruženju (npr. povoljnije visine kotizacija i smještaja kod skupova u organizaciji Udruženja, itd.) tek nakon kontinuiranog uzastopnog plaćanja članarine u trajanju od minimalno 6 mjeseci.

#### **Član 17.**

Svaki član ima iskaznicu, koju dobiva nakon 6 mjeseci uzastopnog plaćanja članarine Udruženju.

Odluku o izgledu i načinu korištenja iskaznice donosi Predsjedništvo.

#### **Član 18.**

O članovima Udruženja vodi se posebna evidencija.

Način i ustrojstvo evidencije utvrđuje Predsjedništvo posebnom odlukom.

#### **Član 19.**

Članstvo u Udruženju prestaje:

- smrću člana, ako je u pitanju fizičko lice,
- brisanjem iz sudskog registra, ako je u pitanju pravno lice,
- prestankom plaćanja članarine,
- istupanjem,
- brisanjem iz članstva,
- isključenjem iz članstva.

#### **Član 20.**

Članstvo usljed neplaćanja članarine prestaje nakon što član Udruženja članarinu nije uplatio za prethodna tri uzastopna mjeseca iz razloga koji nisu objektivne prirode.

O prestanku članstva iz stava 1. ovog člana član se prethodno obavijesti pismenim putem, kao i da se očituje o razlozima prestanka plaćanja članarine. U slučaju da su razlozi objektivne prirode, član se izvijesti da se od momenta obavijesti obaveze plaćanja članarine prema Udruženju izmire u narednih mjesec dana. Po izmirenju obaveza razmatranje za isključenje iz članstva Udruženja prestaje.

U slučaju da se utvrdi da razlozi za neplaćanje članarine nisu objektivne prirode, članstvo u Udruženju usljed neplaćanja članarine prestaje.

## **Član 21.**

Članstvo istupanjem prestaje pismenom izjavom člana da više ne želi biti članom Udruženja. Prije prestanka članstva istupanjem, član je dužan izvršiti sve svoje obaveze prema Udruženju.

## **Član 22.**

Brisanje članstva iz Udruženja nastaje u slučaju kada se utvrdi da uopće nisu postojali uvjeti za učlanjenje.

## **Član 23.**

Isključenjem iz Udruženja, članstvo prestaje na dan konačnosti odluke o isključenju.

Članu se izriče isključenje ako:

- teže povrijedi Statut ili pravila Udruženja,
- povrijedi ugled Udruženja ili ugled i čast drugih članova Udruženja,
- ne izvrši obavezu koju je preuzeo ili koja mu je povjerena, a zbog toga nastupe štetne posljedice po Udruženje,
- pristupi organizaciji čiji su ciljevi suprotni ciljevima Udruženja,
- nedolično se ponaša ili nastupa neovlašteno u ime Udruženja.

Člana iz članstva isključuje Predsjedništvo.

Protiv odluke Predsjedništva član ima pravo žalbe Skupštini Udruženja.

## **V - USTROJSTVO UDRUŽENJA**

### **Član 24.**

Organi Udruženja su:

- Skupština,
- Predsjedništvo.

### **Skupština**

## **Član 25.**

Skupština je najviši organ Udruženja i čine ga svi članovi Udruženja.

Na svakoj sjednici Skupštine bira se većinom glasova predsjedavajući koji vodi sjednicu i koji ima obavezu sazvati novu sjednicu Skupštine. Izuzetak od navedenog se dešava u slučaju sazivanja i vođenja elektronske sjednice Skupštine Udruženja.

Skupština Udruženja ima ove nadležnosti:

- donosi, mijenja i dopunjuje Statut,
- donosi poslovnik o svom radu, kao i sva druga akta čije donošenje proističe iz odredaba ovog Statuta,
- donosi pravila Udruženja,
- na prijedlog Predsjedništva odlučuje o dodjeljivanju priznanja Udruženja pojedincima, ustanovama i privrednim društvima,
- bira i razrješava sve organe Udruženja,
- donosi program rada,
- donosi finansijski plan,

- donosi preporuke, upute i smjernice organima Udruženja,
- razmatra izvještaje o radu organa Udruženja,
- odlučuje o udruživanju u saveze, pripajanju, razdvajanju, transformaciji, prestanku rada i drugim statusnim pitanjima Udruženja,
- odlučuje o svim pitanjima koja nisu u nadležnosti drugog organa Udruženja.

Skupština Udruženja održava se najmanje jednom godišnje, kao redovna sjednica Skupštine, koja može kao ekvivalent biti i u elektronskom obliku, što se naznačava u pozivu za sjednicu. Prema potrebi, na prijedlog Predsjedništva saziva se vanredna sjednica Skupštine.

Skupština donosi odluke iz svoje nadležnosti većinom glasova prisutnih članova.

Izuzetno, Skupština donosi Statut, kao i njegove izmjene i dopune natpolovičnom većinom prisutnih članova Skupštine.

Rad Skupštine, načini njihovog sazivanja, vođenja i odlučivanja na istim, kao i drugi detalji bit će uređeni Poslovníkom o radu Skupštine Udruženja.

### **Predsjedništvo**

#### **Član 26.**

Predsjedništvo ima 15 (petnaest) članova koje bira Skupština iz reda redovnih članova Udruženja, vodeći računa o zastupljenosti kantona/županija u Federaciji i oblika vlasništva institucija iz kojih članovi Predsjedništva dolaze.

Mandat članova Predsjedništva traje četiri godine, s mogućnošću reizbora.

Predsjedništvom rukovodi predsjednik, a u njegovoj odsutnosti ili spriječenosti jedan od dva potpredsjednika Udruženja, kojeg ovlasti predsjednik Udruženja.

Predsjednik i dva potpredsjednika Predsjedništva su po svojoj funkciji predsjednik i dva potpredsjednika Udruženja.

Mandat predsjednika i dva potpredsjednika Predsjedništva traje četiri godine, s mogućnošću izbora za još jedan mandatni period.

#### **Član 27.**

Predsjedništvo ima sljedeće nadležnosti:

- rukovodi radom Udruženja između dvije sjednice,
- odlučuje o imovini Udruženja,
- vrši nadzor nad finansijsko-materijalnim poslovanjem Udruženja,
- poduzima pravne radnje za Udruženje,
- daje prijedloge, inicijative i upute svim organima Udruženja,
- poduzima mjere zaštite interesa Udruženja,
- donosi odluke o članstvu i utvrđuje evidencije članstva Udruženja,
- predlaže i razmatra sve pravne akte prije razmatranja na Skupštini,
- poduzima i druge radnje određene pravilima Udruženja.

#### **Član 28.**

Za pojedine oblasti rada Predsjedništvo posebnom odlukom osniva komisije. Istom odlukom imenuje se povjerenik koji je lično zadužen za sprovođenje povjerenih mu zadataka i odgovoran je Predsjedništvu.

## Član 29.

Predsjednika Udruženja, dva potpredsjednika Udruženja i ostale članove predsjedništva Udruženja na prijedlog Predsjedništva Udruženja bira Skupština natpolovičnom većinom prisutnih članova Skupštine. Gore navedeni prijedlog mogu pojedinačno da daju i članovi Skupštine Udruženja.

Generalnog sekretara Udruženja na prijedlog Predsjedništva Udruženja bira Skupština natpolovičnom većinom prisutnih članova Skupštine. Gore navedeni prijedlog mogu pojedinačno da daju i članovi Skupštine Udruženja.

Glasanje o izboru u pravilu je javno, a Skupština može odlučiti da se provede i tajno glasanje.

Mandat predsjednika Udruženja, dva potpredsjednika Udruženja i generalnog sekretara Udruženja traje četiri godine, sa mogućnošću reizbora za još jedan uzastopni mandatni period.

## Član 30.

Predsjednik i potpredsjednici Udruženja zastupaju i predstavljaju Udruženje.

Predsjednik i potpredsjednik Udruženja imaju nadležnosti u skladu sa odlukom Predsjedništva obustaviti od izvršenja svaki akt organa Udruženja, osim odluke Skupštine, ako ocijeni da ta odluka nije u skladu sa Statutom i pravilima Udruženja.

## Član 31.

### ***Predsjednik Udruženja:***

- zastupa i predstavlja Udruženje pred trećim licima,
- saziva sjednice Predsjedništva i predsjedava im,
- stara se o izvršavanju zadataka koje je postavila Skupština,
- koordinira rad članova Predsjedništva,
- koordinira rad sekcija.

### ***Potpredsjednici Udruženja:***

- zastupaju i predstavljaju Udruženje pred trećim licima,
- koordiniraju rad članova Predsjedništva,
- koordiniraju rad sekcija,
- obavljaju i druge poslove po nalogu predsjednika Udruženja.

### ***Generalni sekretar Udruženja:***

- brine se i vodi evidenciju o članovima Udruženja,
- čuva pečat Udruženja,
- prima, otvara i evidentira poštu,
- stara se o arhiviranju dokumentacije,
- vodi zapisnike sa sjednica organa i komisija,
- stara se o korespondenciji Udruženja,
- vodi administrativne poslove,
- izuzetno, po ovlasti predsjednika Udruženja može potpisati finansijsku i drugu dokumentaciju za Udruženje,
- po nalogu predsjednika i potpredsjednika Udruženja koordinira rad članova predsjedništva Udruženja i sekcija,
- obavlja i druge poslove po nalogu predsjednika i potpredsjednika Udruženja.



**Blagajnik Udruženja:**

- brine se o blagovremenoj naplati prihoda,
- stara se o izradi finansijskog plana Udruženja,
- stara se o naplati članarine,
- vodi računa o osiguranju materijalno-finansijskih sredstava za poslovanje Udruženja,
- vodi evidenciju o izdatim čekovima,
- blagovremeno fakturira potraživanja Udruženja,
- sačinjava izvještaje o materijalno-finansijskom poslovanju Udruženja i dostavlja ih nadležnim organima i službama.

Blagajnik Udruženja je lice koje profesionalno obavlja svoju funkciju, a imenuje ga Predsjedništvo.

Za svoj rad blagajnik je odgovoran svim članovima Udruženja, a posebno Predsjedništvu.

**VI – SEKCIJE****Član 32.**

Svoju aktivnost Udruženje ostvaruje i kroz sekcije.

Broj i nazive sekcija i njihovu selekciju utvrđuje Predsjedništvo s osnovnim zadatkom unapređenja naučno-istraživačkog i stručnog rada u oblasti stomatologije.

**Član 33.**

Sve sekcije imaju organ Kolegij članstva. Obaveza je da se unutar sekcije vodi registar Kolegija članstva i isti redovno blagovremeno dostavlja generalnom sekretaru Udruženja.

Radom Kolegija rukovodi predsjednik Kolegija, koji je istovremeno i predsjednik sekcije. Predsjednika sekcije Kolegij članstva sekcije na sjednici bira natpolovičnom većinom na mandatni period od četiri godine, sa mogućnošću jednog reizbora.

Predsjednik sekcije je obavezan sazvati sjednicu Kolegija članstva najmanje jednom godišnje. Članovi Kolegija moraju biti članovi Udruženja. Stručni skupovi sekcija se obavezno moraju sazivati najmanje jednom godišnje.

Predsjednik sekcije Udruženja je za svoj rad odgovoran Kolegiju članstva a jednom godišnje je u obavezi podnijeti izvještaj o radu Predsjedništvu i Skupštini Udruženja.

**Član 34.**

Kolegij članstva na svojim sjednicama raspravlja o programima i planovima aktivnosti, izvještajima o radu, donosi odluke o uređenju međusobnih odnosa između članova unutar sekcije.

**VII - JAVNOST RADA UDRUŽENJA****Član 35.**

Rad Udruženja je javan.

Javnost u radu Udruženja obezbjeđuje se davanjem podataka o radu Udruženja predstavnicima sredstava javnog informisanja, redovnim i povremenim obavještanjem članstva o svim aktivnostima unutar Udruženja saglasno propisima o slobodi pristupa informacijama u Federaciji.

Podatke iz stava 2. ovog člana saopštava predsjednik Udruženja ili u njegovoj odsutnosti potpredsjednik Udruženja.

## **VIII- PRELAZNE I ZAVRŠNE ODREDBE**

### **Član 36.**

U slučajevima prestanka rada Udruženja, imovina koja ostane nakon podmirivanja svih obaveza Udruženja, prelazi u vlasništvo one organizacije koja preuzme funkciju Udruženja.

### **Član 37.**

Izmjene i dopune ovog Statuta donose se na način i pod uvjetima kako je propisano za donošenje ovog Statuta.

### **Član 38.**

Akta koja proističu iz odredbi ovog Statuta donijet će se u roku od godinu dana od dana njegovog stupanja na snagu.

### **Član 39.**

Ovim Statutom prestaje primjena prečišćenog teksta Statuta Udruženja stomatologa u FBiH (akt broj 02-11-1-2/2020 od 30. 11. 2020. godine).

### **Član 40.**

Ovaj Statut stupa na snagu danom donošenja na redovnoj Skupštini Udruženja, a primjenjivat će se od dana upisa promjena Udruženja u registar udruženja koji se vodi kod Federalnog ministarstva pravde.

M. P.

prof. dr. sci. Elmedin Bajrić

---

predsjedavajući Skupštine USFBiH

Dostaviti:

- članovi Skupštine USFBiH;
- Ministarstvo pravde FBiH
- arhiva USFBiH.